

Siunnersuummut nassuiaatit

Nassuiaatit nalinginnaasut

1. Aallaqqaasiut

Imigassaq pillugu Inatsisartut Inatsisaat nr. 35, 23. november 2017-imeersoq maannakkut atuuttoq ukiuni kingullerni oqallisigineqartarsimavoq.

Allannguutissatut inatsit manna Naalackersuisunit saqqummiunneqartoq aalajangiiffigisassatut siunnersuutit sisamat, 2018-imi ukiakkut ataatsimiinnermi Inatsisartunit oqaluuserineqartut, tunngavigalugit suliarineqarpoq:

Aalajangiineq UPA 2018/52 imatut taaguutilik: *"Inuusuttut 18-t inorlugit ukiullit unnukkut nalunaaqutaq 20:00-p kingorna Cafèliarlutik kakaoitorsinnaangornissaat, sodavanditorsinnaangornissaat assigisaannilluunniit najoqqaasinnaangornissaat pillugu Imigassaq pillugu Inatsisartut Inatsisaanni § 20 imm. 4 atorunnaarsinnissaanut siunnersuuteqaqqullugit Naalackersuisut peqquneqarnissaanik Inatsisartut aalajangiiffigisassaattut siunnersuut."*

Aalajangiineq UPA 2018/53 imatut taaguutilik: *"Imigassaq pillugu inatsit allanngartinniarlugu siunnersuummik saqqummiusseqqullugit Naalackersuisut peqquneqarnissaanik Inatsisartut aalajangiiffigisassaattut siunnersuut, taamaasillutik niuertarfiit imigassanik aalakoornartortalinnik nioqquteqarsinnaalersillugit ataasinngornermiit arfininngornermut nalunaaqutaq 10:00-imit 20:00-ip tungaanut."*

Aalajangiineq UPA 2018/54 imatut taaguutilik: *"Imigassamut inatsimmi imigassat aalakoornartortalit pillugit pilerisaarutit sulluunniit inerteqqutaanerata atorunnaarsinnissaa imaluunniit allamik taama sakkortutigisumik taarserneqarnissaanut Imigassaq pillugu Inatsisartut inatsisaata allanngartinnissaanut allannguutissamik saqqummiusseqqullugit Naalackersuisut peqquneqarnissaanik Inatsisartut aalajangiiffigisassaattut siunnersuut."*

Aalajangiineq UPA 2018/55 imatut taaguutilik: *"Imigassaq pillugu Inatsisartut inatsisaani § 28-p atorunnaarsinnissaanut siunnersuuteqaqqullugit Naalackersuisut peqquneqarnissaanik Inatsisartut aalajangiiffigisassaattut siunnersuut, taamaasilluni imigassaq nioqqutissanut allanut naleqqiullugu saagorsimajunnaartussanngorlugu."*

2. Siunnersuummi immikkoortut pingaarnerit

2.1 Inuusuttut 18-it inorlugit ukiullit sassaallertarfinniittarnerannut piffissamik sivitsuineq Imigassaq pillugu inatsisikkut siunertaasimangilaq inuusuttut unnukkut cafémi isersimasut takussaasumik qaqutigunnaq aalakoofigisartagaanniikkunnaarsinnaajunnaarsinnissaat.

Aammattaarmi cafémi avatangiisit imerniartarfinni nalinginnaasunisulli inuusuttut immikkut illersugaanissaannik pisariaqartitsiviunngillat. Inatsisartut inatsisaanni sassaallertarfiit qanoq paasineqarnissaannik nassuiaatini imerniartarfiit caféllu akornanni immikkoortitsisoqanngimmat, inuusuttut ilagineqaratik tamakkunaniinnissaannut aalajangersakkami piffissaliussaq nal. 20:00-miit nal. 23:00-imut sivitsorneqassasoq siunnersuutigineqarpoq. Immikkut ittumik oqaaseqaatit innersuussutigineqarput.

2.2 Pisiniarfiit imigassamik tuniniaanermut ammasarfiinik sivitsuineq

Siunnersuummi matumani piffissat ammasarfiit imatut sivitsorneqarput imigassamik aalakoornartulinnik pissusissaatut akuersissummik pigisaqarluni tuniniaaneq ataasinngornermiit arfininngornermut nal. 10:00-miit 20:00-mut pisinnaangorlugu. Taamaaliortoqarpoq nunatsinni innuttaasut pisiniarfiliarnerminnut atatillugu periarfissarissaarnerulernissaat siunertaralugu.

2.3 Imigassap ussasaarutigineqaqqusaannginneranik maannakkut atuuttumik qasukkaaneq

Imigassaq pillugu Inatsisartut Inatsisaat nr. 35, 23. november 2017-imeersukkut imigassat aalakoornartullit ussasaarutigineqaqqusaajunnaarput. WHO-p Imigassaq pillugu Europami Nalunaarutaa aallaavigalugu atuutilersitsisoqarpoq, tassanimi allassimammat meeqqat tamar-mik avatangiisiminni imigassamik tunitsivissarsiornermut illersugaallutik alliaartorsinnaatitaa-sariaqartut. Ilaatigut taamaaliortoqarsinnaavoq tunitsivissarsiorniarluni iloriusissianut imigassamik atuulernissamut ukiukillisaqataasunut meeqqat inuusuttullu ingalassimaartinnerisigut taamatullu inuusuttut nalinginnaasumik imigassamik atuinikinnerulersinnerisigut.

Aalajangiiffigisassatut siunnersuuteqarnermut tunngavilersuutigineqartut ilagaat meeqqat inuusuttullu tunitsivissarsiorluni iloriusissianut ingalassimaartinniarlugit tamakkiisumik inerteqquteqarneq siunertarineqartut siuliini taaneqartut akuersaarnissaannut sillimmartaarutissatut ingasappallaartoq. Taamaamat inerteqqut siunnersuummi matumani qasukkartineqarpoq. Taamaallaat suliffeqarfiit matoqqasunik nittartagaanni imaluunniit tuniniaavinni sassaallertarfinniluunniit imigassamik aalakoornartulinnik tunitsivissarsiorortoqarsinnaavoq. Taamaalilluni tusagassiuutini naqitani imaluunniit illoqarfiup ilaani aalajangersimasumik aallaaveqarluni meeqqat ajornannginnerusumik tikissinnaasaanni tunitsivissarsiorortoqarsinnaannginneranik aallaaveqarneq aalajangiusimaneqarpoq. Taamatuttaaq tunitsivissarsiornermut inatsimmi pitsaasumik tunitsivissarsiornermi ileqqoqarnissaq aamma meeqqanut inuusuttunullu sammisitamik tunitsivissarsiornermut malittarisassat innersuussutigineqarput.

Tamakkiisumik inerteqquteqarneq nunani allamiut tamakkuninnga suliaqartut unammiller-neratigut equsoortitseqataasimasoq taamaaliornikkut nalimmassarniarneqarpoq. Imigassaq pillugu Inatsisartut inatsisaata allannngortinneqarnissaanik siunnersuutikkut tunisassiat taa-

matuttaaq najukkani tunisassiaralugit imigassat tunitsivissarsiorneqarsinnaanerit iluaq-
serniarneqarpoq.

2.4 Imigassat assersorneqarsimanissaat pillugu piumasaqaammik atuuttumik atorunnaarsi-
tsineq

Imigassaq pillugu Inatsisartut Inatsisaat nr. 35, 23. november 2017-imeersukkut pisiniarfii-
pisussaaffilerneqarput pisiniarfimmi imigassat aalakoornartullit nioqqutissanit allanit immik-
koortisimaneqassasut. Taamaaliortoqarpoq kissaatigineqarmat imigassat takussaanerat anni-
killisinneqassasoq. Siunertaavoq inuiaqatigiinni imigassamik atuinerup taamaalillunilu imi-
gassamik pissuteqartumik malitsigisaasunik sunniutaasartut annikillisinneqarnissaat.

Maannakkut allannguutissatut siunnersuutikkut pisiniarfiit imigassanik aalakoornartulinnik
tuniniaaviusunik iluarsisimanissaannut taamatut piumasaqaat atorunnaarsinneqarpoq.

Siunniunneqarpoq pisiniarfiit assiaqutsersuisimaneq attatiinnassanerlugu namminneq aala-
jangissagaat.

Inatsisissatut siunnersuut inatsimmut atuuttumut sanilliullugu	
<i>Oqaasertaasut maanna atuuttut</i>	<i>Inatsisissatut siunnersuut</i>
	§ 1 Imigassaq pillugu Inatsisartut Inatsisaat nr. 35, 23. november 2017-imeersumi uku allangortinneqassapput:
	1. § 2-mi imm. 8-tut ilanngunneqassaaq: ” Inuusuttutut 18-it ataallugit ukiulittut paasineqassapput inuit 15-iniit 18-inut ukiullit .”
§ 20 imm. 4: <i>Imm. 4.</i> Nal. 20:00-ip kingorna inuusuttut 18-it inorlugit ukiullit sassaallertarfinnut imigassanik aalakoornartulinnik sassaallertartunut iseqqusaassanngillat angajoqqaaminnit, nakkutiginnittuminnit imaluunniit inummik allamik oqartussaassusilimmit inuusuttumut immikkut akisussaasumit ilagineqanngikkunik. Akuersissummik pigisaqartup aamma taassuma sulisuisa pisussaaffigaat nakkutigissallugu inuusuttup 18-it inorlugit ukiullip pissusissamisoortumik ilagineqarnissaa.”	2. § 20 imm. 4 imatut oqaasertalerneqassaaq: " Nal. 23:00-ip kingorna inuusuttut 18-it inorlugit ukiullit sassaallertarfinnut imigassanik aalakoornartulinnik sassaallertartunut iseqqusaassanngillat angajoqqaaminnit, nakkutiginnittuminnit imaluunniit inummik allamik oqartussaassusilimmit inuusuttumut immikkut akisussaasumit ilagineqanngikkunik. Akuersissummik pigisaqartup aamma taassuma sulisuisa pisussaaffigaat nakkutigissallugu inuusuttup 18-it inorlugit ukiullip pissusissamisoortumik ilagineqarnissaa.”
§ 25. Imigassanik aalakoornartortalinnik tuniniaaneq pisinnaavoq ataasinngornermit tallimanngornermut nal. 09.00-imit 18.00-imit aamma arfininngornermi nal. 10.00-imit 14.00-imit.	3. § 25, imm. 1 imatut oqaasertalerneqassaaq: ” Imigassanik aalakoornartulinnik tuniniaasoqarsinnaavoq ataasinngornermiit arfininngornermut nal. 10:00-niit 20:00-mut.”
<i>Imigassap ussasaarutigineqartarnera</i>	4. § 26-p kingornatigut immikkoortortap qulequtaa imatut allanneqassaaq: “ <i>Pisiniarfinni imigassanik aalakoornartortalinnik inissiisarneq aamma imigassaq ussasaarutigineqartarnera.</i> ”

	<p>5. § 27, imm. 4, atorunnaarsinneqassaaq, taarsiullugulu imm. 3-p kingornatigut imm. 4-tut nutaatut ikkunneqassalluni: ” <i>Imm. 4.</i> Imm. 1-imi aamma 2-mi inerteqqutaagaluartoq suliffeqarfiit internettimi suliffeqarfiit matoqqasunik nittartagaanni imigassanik aalakoornartortalinnik nittarsaassisinnaapput. Imatut tunitsivissarsiortoqassaaq qupperneq matoqqasoq taamaallaat imigassanik aalakoornartulinnik imaqartillugu.</p>
<p>§ 27 imm. 4: <i>Imm. 4.</i> Pisiniarfinni ininilu sassaallertarfinni assiaqtsersorsimasuni ussassaarineq imm. 1 aamma 2-mi inerteqquteqarnernut ilaatinneqanngilaq.</p>	<p>6. § 27-mi imm. 4-ip kingornatigut immikkoortoq nutaatut ikkunneqassaaq: ” <i>Imm. 5.</i> Imm. 1-imi aamma 2-mi inerteqqummut ilaanngilartaaq ussassaarineq pisiniarfiup initaani aamma sassaallertarfiup initaani pisoq aalakoornartortaata procentia apeqqutaatinnagu.” <i>Imm. 5</i> matuma kingorna tassaalerpoq imm. 6.</p>
	<p>7. § 27-mi imm. 7-itut ilanngunneqassaaq: ” <i>Imm. 7.</i> Imigassat aalakoornartullit ussassaarutigineqarnerat imigassap saniatigut sunniutigisartagai taamatullu pinngitsuuisinnaajunnaarneq sumi pisinnaanersoq pillugit paasissutissanik ilaqartinneqartassaaq.</p>
<p>Pisiniarfinni imigassanik aalakoornartortalinnik assiaqtsersuisarneq</p>	<p>8. § 27-p kingornatigut immikkoortortap qulequtaa atorunnaarsinneqassaaq.</p>
<p>§ 28. Imigassat aalakoornartortallit tamarmik pisiniarfimmi pisiassanit allanit assiaqtsersorsimassapput.</p>	<p>9. § 28, imm. 1 atorunnaarsinneqarpoq. <i>Imm. 2</i> matuma kingorna tassaalerpoq imm. 1</p>
<p>§ 28.</p>	<p>10. § 28 imm. 1-imi ”assiaqtsersuineq aamma” peerneqarpoq.</p>

<i>Imm. 2 Naalakkersuisut pisiniarfinni imigassanik aalakoornartulinnik assiaqutsersuisarneq inissiisarnerlu pillugit malittarisassanik erseqqinnerusunik aalajangersaasinnaapput.</i>	
	<p style="text-align: center;">§ 2</p> <p>Inatsisartut inatsisaat inatsisip tamanut saqqummiunneqarnerata aqaguani atuutilissaaq.</p>

3. Pisortanut aningaasaqarnikkut allaffissornikkullu kingunerisassai:

Naatsorsuutigineqarpoq siunnersuutip imigassap tunisaanerata annertuseriarnera kingunerissagaa taamaalillunilu akitsuutitut tunngassuteqartuni pisortanut isertitaqarnerulissutaassalluni. Taamatuttaaq imigassartornerulernerup inooriaatsimik pissuteqartumik nappaatinut taamatullu pinngitsuuisinnaajunnaarnermut katsorsaanermut aningaasartuutitut atatillugu sulii aningaasartuuteqarnerulerneq kingunerissavaa. Tamakku saniatigut siunnersuut inunnik isumaginninnermut tunngassuteqartuni tuniluuttumik sunniuteqassasortaaq naatsorsuutigineqarpoq.

4. Inuussutissarsiortunut aningaasaqarnikkut allaffissornikkullu kingunerisassai.

Siunnersuut imigassanik tunisaqarnerulernermik, inuussutissarsiortunut kaaviiartitsinerulernermik kinguneqartumik, kinguneqassasoq naatsorsuutigineqarpoq. Siunnersuutikkut pisiniarfiit imigassamik tuniniaanerannut piffissamik sivitsuisoqarmat, aammattaaq arfininngornikkut, tamanna sassaallertarfiit isertitamikkut annaasaqaatigissagunarpaat. Tamakku saniatigut tunisaqarnerusalernissaq naatsorsuutigineqarpoq, tassami pisiniarfiit imigassamik neqeroorutitik tunitsivissarsiorsinnaalissamatigit. Imigassap ussasaarutigineqaaqusaannginneranik qasukkaaneq tunisassiat aalakoornartullit unammilleqatigiissutigineqarnerannik annertuseriartitsissasoq naatsorsuutigineqarpoq.

Pisiniarfinni imigassamik tuniniaaneranut ammasarfiit sivitsorneqarneratigut angerlarsimaffinni imigassaliortarnerup imigassamillu akuerineqarani tuniniaasarnerup annikilleriarnerannut iluaqutaassasoq naatsorsuutigineqarpoq, maannakkummi ajornannginnerusumik pineqarsinnaalissamat.

5. Avatangiisinut, pinngortitamut inuillu peqqissusaannut kingunerisassai

Naatsorsuutigineqarpoq siunnersuut imigassap tunisaanerulerneranik kinguneqassasoq taamaalillunilu inuit peqqissusaannut pitsaanngitsumik sunniuteqarluni. Imigassanik aalakoornartortalinnik atueriaaseq ajortup tungaanut sunniuteqarfigissavaa ilaatigut pinngitsuuisinnaajunnaarnikkut tamatumalu malitsigisaanik sunniuttutigut takuneqarsinnaasumik, assersuutigalugu inunnik isumaginninnermut tunngassuteqartuni.

6. Innuttaasunut kingunerisassai

Imigassap ussassaarutigineqaqqusaannginneranik qasukkaanikkut pisiniarfiit imigassap ussassaarutiginissaanut periarfissarissaarnerulissapput tamatumuuna tuniniaavinni unammilleqatigiinneq annertuseriarluni akillu sunnerneqarlutik. Taamaammatt naatsorsuutigineqarpoq siunnersuutip imigassamik tuniniaanermut atuinerullu annertunerulernerat kingunerissagaa, tassami imigassat aalakoornartullit saqquminerulissammata taamatullu innuttaasunit pissarsiariuminarnerulissallutik. Imigassamik atuinerulernerq inuiaqatigiinni inuuniarnikkut pissutsini takuneqarsinnaalissaaq.

7. Kingunerisassai pingaarutillit allat:

Siunnersuut pingaarutilinnik allanik kinguneqassasoq naatsorsuutigineqanngilaq.

8. Oqartussaasunik suliniaqatigiiffinnik allanillu tusarniaaneq

Siunnersuut tusarniaavigisartakkanut ukununnga ulluni 17.12.2018-miit 21.01.2019-mut tusarniaassutigineqarpoq:

Namminersorlutik Oqartussani naalakkersuisoqarfinnut tamanut, Peqqissutsimut Pinaveersaartitsinermullu Aqutsisoqarfimmu, Allorfimmu aamma ukununnga Kommuneqarfik Sermersooq, Kommune Kujalleq, Qeqqeta Kommunia, Kommune Qeqertalik, Avannaata Kommunia, Det Grønlandske Kriminalpræventive Råd, Nunatta Nakorsaaneqarfia, Nunatta Eqqartuussivia, Kalaallit Nunaanni Eqqartuussiviit, Kalaallit Nunaanni Naalagaaffiup Sinniisoqarfia, Grønlands Erhverv, KNI, Pisiffik, Brugseni, Politimesteren i Grønland, MIO, Alkohol- og Narkotikarådet, GIF, Foreningen grønlandske børn.

Tamakku saniatigut siunnersuut Naalakkersuisut tusarniaassutigisaminnut nittartagaanni piffissami tassani pissarsiarineqarsinnaasimavoq.

Tusarniaanermut akissutit xx-it tiguneqarput, taakkunannga uku oqaaseqaateqarsimanatik:

Tusarniaanermut akissutit uku siunnersuummut oqaaseqaatinik imaqarput:

Tulliuttumi tusarniaanermut akissutit allannguutissatullu siunnersuutit tiguneqartut suliarineqarput.

Tusarniaanermut akissutit tamarmiutillugit uingasunngorlugit taakkununngalu Naalakkersuisut oqaaseqaataat issuarneqarput.

Siunnersuummi aalajangersakkanut ataasiakkaanut oqaaseqaatit

§ 1-imut

Nr. 1-imut

Inatsisartut inatsisaannut tunngatillugu inuusuttut 18-it inorlugit ukiullit qanoq paasineqassanersut nassuiassallugu pissusissamisoorineqarsimavoq. Taamaappoq aammattaaq sassaallertarfiit aqqissuussaanerannut neqeroorutaannullu tunngatillugu, aammattaaq inuusuttut unnuaruleranerani cafémiittarnerannut tunngatillugu. Taamatuttaaq meeqqat inuusuttullu erseqqissumik qanoq paasineqarsinnaaneratik politit Inatsisartut inatsisaannik unioqqutitsisoqarsinnaaneratik nakkutilliinissaaminut periarfissaqalissapput, taamatuttaaq assersuutigalugu § 32, imm. 2 malillugu pisinnaatitaaffii eqqarsaatigalugit.

Aalajangersagaq malillugu inuusuttut tassaanerarneqarput inuit 15-it 18-illu akornanni ukiullit, tassa imaappoq inuit 15-inik ukioqalereersimasut kisiannilu sulii 18-inik ukioqalersimanatik. Tamatuminnga pissuteqartumik meeqqat Inatsisartut inatsisaanni paasinnittaaseq malillugu taakkuulerput sulii 15-inik ukioqalersimannngitsut.

Nr. 2-mut

Inuit 18-inik ukioqalersimannngitsut sassaallertarfinniissinnaaneratik nal. 20:00-imiit 23:00-imut sivitsorneqarpoq imaalillugu inuit 18-inik ukioqalersimannngitsut piffissami tassani cafémiissinnaalersillugit inersimasumit 18-inik ukioqalereersimasumik ilagineqanngikkaluarlutik. Nal. 20:00-imut maannamut piffissamik killiliineq inuit 18-inik ukioqalersimannngitsut caféliarsinnaanerannut tunngatillugu killilersuivallaarnertut nalilerneqarpoq. Cafémi avatangiisit imatut pissuseqassanganneqanngillat inuit 18-it inorlugit ukiullit tassaniinnerminnut illersortariaqassallutik.

Inuinuku sassaallertarfinniinneratik aalajangersakkakut malittarisassaqartinneqarniarpoq. Taamaalilluni inatsisit allat malillugit inatsisit malitsigisaannik pissutsit allanngortinneqarnissaat siunertarineqanngilaq, assersuutigalugu inuusuttut piffissat suliffigisartagaat il.il. pillugit Kalaallit Nunaanni suliffimmi avatangiisit pillugit inatsit malillugu sulisartunut suut atuunnersut.

Nr. 3-mut

Imigassanik aalakoornartortalinnik tuniniaanermut piffissaliusseq sivitsorneqassaaq imaalillugu ataasinngornermiit arfininngornermut nal. 10:00-miit 20:00-imut tuniniaasoqarsinnaasunngorlugu. Taamaammatt imigassanik aalakoornartortalinnik

tuniniaaneq piffissami sivisunerusumi pisinnaangussaaq taamaaliornikkut innuttaasut ulluinnarni pisiniartarnerminni periarfissagissaarnerulissallutik.

Tuniniaaviit ilisimassavaat tuniniaanerup aallartinneranut piffissaliussaq nal. 09:00-imiit nal. 10:00-imut nuunneqassammat.

Nr. 4-mut

Imigassamik tunitsivissarsiorinissap inerteqqutaanera maannakkut atuuttoq qasukkarneqarpoq. Tamatuma kingunerissavaa piumasaqaatit erseqqinnerusumik allassimasut malillugit imigassap ussasaarutigineqarsinnaalernera.

Ussassaareqqusaannginnermik qasukkaaneq ilusilersugaavoq siunertaralugu imigassanik aalakoornartortalinnik taamatuttaa najukkani immiukkanik tunitsivissarsiorarneq ammaanniarlugu kisiannili peqatigitillugu inini tamanit iserfigineqarsinnaasuni imigassanik aalakoornartortalinnik tunitsivissarsioriaatsinut meeqqat inuusuttullu sapinngisamik annertunerpaamik ingalassimatinniarlugit. Tassunga atatillugu pingaaruteqarpoq ussasaarinnermut aallaaviusut oqartussaasunit nakkutigineqarsinnaanissaat malinnitsinneqarnissaallu. Taamaammat suliffeqarfiit namminneq nittartakkamini matoqqasumik nittarsaassivikkut imigassanik aalakoornartortalinnik ussasaaruteqarnissamut periarfissinneqarput. Taamaammat pisariaqarpoq ataasiakkaat tamakku ujarlerfigisassagaat teknikikkullu sillimmartaarutit atorlugit qulakkeerinneqataaaffigalugu quppernernik ujaasisut 18-inik ukioqalereersimanissaat. Attaveqaatini taamaattuni pingaaruteqarportaaq imigassanut aalakoornartortalinnut ilanngullugu nioqputissanik allanik ussasaarisoqartannginnissaa taamatuttaa pingaartumik nioqputissanik meeqqanut sammisitanik assersuutigalugu imeruusaatinik.

Nr. 5-imut

Aalajangersakkap imm. 1-imi oqaasertai malillugit tusagassiuutini naqitani imaluunniit aalajangersimasuni atorneqartuni allani illoqarfimmi takussaasuni ussasaarinissaa ajornartitaavoq, tamakku tassaasinnaapput bussit unittarfiini illuaqqat imaluunniit katersortarfik. Tamakkununga ilaanngilaq ussasaarineq pisiniarfiup initaani aamma inip sassaallertarfiusup iluani pisoq. Taaneqartoq kingulleq Inatsisartut inatsisaannik atuuttumik ingerlatitseqqinneruvoq.

Nr. 6-imut

§ 27, imm. 7 nutaajuvoq akuersissummillu pigisaqartumut pisussaaffiliilluni imigassamik tuniniaavinni sassaallertarfiniluunniit imigassap saniatigut sunniutigisartagai pillugit paasissutissiisoqartassaq taamatullu paasissutissiisutigisarlugu sumi pinngitsuuisinnaajunnaarnermik pisariaqartinneqartumik katsorsaaneq neqeroorutaanersoq assersuutigalugu Allorfimmi. Taamaaliortoqartassaaq nittartakkakkut taamatullu

allagarsiinikkut. Pingaartinneqarsimavoq saniatigut sunniutaasartut pillugit tamatigut paasissutissiisoqartarnissaa. Taamaaliornikkut siunertaralugu imigassanik aalakoornartortalinnik atuinerup pissusiviusunit kusanarnerusunngortinneqannginnissaa qulakkeerniarlugu.

Nr. 7-imut

§ 28, stk. 1-ip pisiniarfinni imigassat aalakoornartortallit assersorneqarsimanissaannut tunngasup atorunnaarsinneqarnerata kingunerisaanik immikkoortortap qulequtaa tassunga tunngasoq allanngortinneqarpoq taamaallaat pisiniarfinni imigassat aalakoornartortallit inissisimaffiannut tunngasunngorlugu.

Nr. 8-mut

Aalajangiiffigisassatut siunnersuutip akuersissutigineqartup kingunerisaanik pisiniarfinni assersuisimanissaq pillugu § 28, imm. 1 atorunnaarsinneqarpoq. Taamaammatt pisiniarfiit imigassanik aalakoornartortalinnik assersuisussaataajunnaarput.

Nr. 9-mut

§ 28, imm. 1-imi piginnaatitsissummik aalajangersagaq ilaatigut maannakkut § 28, imm. 2-mik ingerlatitseqqinneruvoq. Assersuisussaataanermik piumasaqaatip atorunnaarsinneqarnerata kingunerisaanik Naalakkersuisut pisiniarfiit assersuisarnissaat pillugu malittarisassanik erseqqinnerusunik aalajangersaasinnaanerannut inatsisitigut tunngavissat peerneqarput. Taamaattoq Naalakkersuisut pisiniarfiit pisiniarfimmi namminermit imigassanik aalakoornartortalinnik sumut inissiisarnissaannut erseqqinnerusunik malittarisassaliortarnissaannut periarfissiineq ingerlateqqinneqarpoq. Piginnaatitsissut sulii atorneqanngilaq, kisiannili atorfissaqartinneqarluinnartut nalilerneqarluni meeqqat ilaqqutalik ilagalugit ulluinnarni pisiniarfinniikkaangamik imigassamik annertuumik ulorianartorsiortinneqarnerannit ingalassimatinniarneqarnerannut atatillugu. Nioqqutissap pisiniarfimmi inissisimanera tunitsivissarsioriaatsimut annertuumik sunniuteqartarpoq, tassami ulluinnarni atugassanik pisiniarfiit avataangiisaammata ilaqutariit meerartallit ornigartuagaat imaaliallaannarlu pinngitsoorsinnaanngisaat.

Nr. 10-mut

Aalajangersagaq atorunnaarsinneqarpoq taamaalillunilu pisiniarfinni imigassat assersorneqartarnissaannik piumasaqaat atuukkunnaarpoq. Taamaattoq pisiniarfinni imigassanik aalakoornartortalinnik inissiisarneq pillugu malittarisassanik aalajangersaasarneq pillugu imm. 2-mi piginnaatitsissummik aalajangersagaq nr. 6-imut oqaaseqaatini allassimasutut ingerlateqqinneqarpoq.

§ 2-mut

Aalangersakkami Inatsisartut inatsisaata atuutilersinneqarnissanut piffissaliussa
allassimavoq.